



Gratuziuns per telefon per ses emprim cranz: Andrin Poltera.



Curdin Orlik cun segl figl Pierin Orlik.



Cuntent cun las prestaziuns da ses figls: Paul Orlik.



In ulteriur cranz er per il lutgader grischun Ursin Battaglia.



La giuria persequitescha la lutga: Stefan Fausch, Reto Attenhofer e Fridolin Beglinger (da san.).



Ina classa per sasez ad Arosa: Armon Orlik (a san.).

FOTOS G. N. STGIER

Armon Orlik è pront per Herisau

Arosa: Lutga grischuna-glarunaisa

DA GION NUTEGN STGIER / ANR

■ Sis giadas la nota maximala e clera victoria en la lutga finala per Armon Orlik, il lutgader grischun. Sper el han anc tschintg lutgaders da noss chantun fatg il cranz. Ina gronda festa da lutga cun blers aspectaturs ed ina organizaziun perfetga. La Festa da lutga grischuna-glarunaisa ha attratg passa 300 amis da lutga ad Arosa. Gia dapi intgins onns ha il sport da lutga er en noss chantun numerus aderents e quai er da la generaziun giuvna. Cumenzà dretg ha l'interess per la lutga avant decennis, cun il success da *Stefan Fausch* ed ils davos onns cunzunt grazia a las prestaziuns grondiusas d'*Armon Orlik*. En Svizra tutga el tar in dals «stars da shooting» tranter ils lutgaders d'asper *Samuel Giger*, il lutgader dal chantun Turgovia e *Remo Käser*, il lutgader bernais. Ad Arosa è lura Orlik er stà il grond star, tiers l'absenza da Giger, el ch'ha già da dar forfait pervia d'in tagli succedi en sia professiun da lainari.

Vers 100 lutgaders giuvens

Jürg Ritter, il president da l'Associaziun grischuna da lutga, è sa mussà fitg cuntent dal success dad Orlik. El sa chatta en furma ed er pront per la Festa da lutga da la Svizra nordorientala da dumengia proxima a Herisau. Il president chantunal dals lutgaders è però er losch ch'anc tschintg ulteriurs lutgaders grischuns han fatg ad Arosa il cranz. Quai èn: *Ursin Battaglia*, *Roman Hochholdinger*, *Marcel Reber*, *Livio Gossweiler* e *Marc Jörgler*. Ritter ha er menziunà che da preschent haja l'Associaziun da lutga chantunala bunamain 100 lutgaders giuvens. Tranter quels sa chattan intgins cun in grond potenzial. Quai che pertutga



Cusseglie governativ Martin Jäger, flancà da Roland Schuler, il president dal comité d'organizaziun, e Jürg Ritter, il president dals lutgaders grischuns.

l'avegnir dal sport da lutga en il Grischun dastgan ins esser plain speranza, accentuescha Ritter.

Nagin duel tranter ils dus frars

Cun esser preschent ad Arosa d'asper Armon Orlik er ses frar pli vegl, *Curdin Orlik*, el ch'ha represchentà l'Associaziun da lutga bernaisa, fiss bain stà il giavisch da blers aspectaturs ch'ils dus frars cuntanschan la lutga finala. Uschè gliunschn'èsi dentant betg vegnì cun perder Curdin Orlik en la 5avla lutga cunter il pli tard finalist *Roger Rychen*, il lutgader glarunais. En l'emprima lutga aveva Curdin Orlik gia fatg in pari cunter *Daniel Bösch*, l'anteriur victur da la lutga «Unspunnen». A la fin ha Curdin Orlik obtegnì il 4. plaz cun anc trais ulteriurs lutgaders. In da quels è *Andrin Poltera*, uriund da Savognin e sesent ad Urnäsch. Ad Arosa ha el fatg ses emprim cranz è già in plaschair da

quel sco nagins auters dals 23 lutgaders ch'han retschet las arbajas. Qual vala però er per il Grischun Livio Gossweiler.

Ina classa per sasez

Da batter il matadur grischun Armon Orlik n'è reussì a nagin lutgader cun esser il Sursilvan dumengia passada nunbattibel. Il victur ha persvas quai che pertutga tecnica, moviments, forza, sveltezza e lura er cun esser mental fitg preschent. Da guardar co ch'el ha lutga liber, cun fermezza e superiur è stà in'aventura sportiva ed er in confirm che dumengia proxima a Herisau vegn el ad esser il grond favorit per turnar a chasa sco victur da la lutga dal nordost da la Svizra. La lutga finala ad Arosa cunter Roger Rychen ha cuzzà trais minutas e sis secundas, uschia ch'ella era gia decidida suenter be in quart dal temp ch'ils dus lutgaders avevan a disposiziun.



Damas d'onur tutgan tar ina festa da lutga.